

Bosna i Hercegovina
Federacija Bosne i Hercegovine
Zeničko-dobojski kanton
GRAD ZENICA
Sektor za javna preduzeća i javne ustanove

Broj: 19-227/25
Zenica, 28.05.2025. godine

STRUČNA SLUŽBA GRADSKOG VIJEĆA

PREDMET: Izvještaj o poslovanju PD “Regionalna deponija Mošćanica” d.o.o. Zenica za 2024. godinu

Sektor za javna preduzeća i javne ustanove u ime Osnivača razmotrio je Izvještaj o poslovanju PD “Regionalna deponija Mošćanica” d.o.o. Zenica za 2024. godinu sa pripadajućim setom izvještaja i konstatuje sljedeće:

U izvještajnom periodu PD “Regionalna deponija Mošćanica” zastupala je Mia Pojskić, dipl.oec., a funkciju Nadzornog odbora obavljali: Selver Keleštura, Sanda Alispahić i Ajdin Baručija.

Privredno društvo “Regionalna deponija Mošćanica” d.o.o. Zenica je javno preduzeće čija je osnovna djelatnost prijem, obrada i zbrinjavanje komunalnog i njemu sličnog neopasnog otpada na ekološki prihvatljiv način. Sredstva za izgradnju prve faze deponije zadužilo je Društvo u iznosu 7 miliona USD, a garancije za vraćanje kredita je dala tada Općina Zenica. Društvo je zvanično pušteno u rad 05.06.2008. godine. Društvo već 14 godina uredno izmiruje anuitete kredita prema Svjetskoj banci, pri čemu je preostalo oko 2,27 miliona KM duga.

Prijem otpada na deponiji se odvija svakodnevno u vremenu od 07:00 do 23:00 sata. Osim zbrinjavanja otpada, Deponija se bavi i izdvajanjima reciklabilnih materijala poput PET ambalaže, tvrde plastike, metala, papira, guma i drva. PET ambalaža i karton se presuju, baliraju i privremeno skladište do prodaje na tržištu za reciklažu.

Na dan 31.12.2024. godine u Društvu je bilo zaposleno ukupno 34 radnika (32 sa ugovorom o radu na neodređeno vrijeme, 1 sa ugovorom o radu na određeno i direktor čiji se radni angažman vezuje za mandatni period).

U toku 2024. godine PD RDM je svakodnevno i kontinuirano pružalo usluge zbrinjavanja komunalnog, građevinskog kao i različitih vrsta neopasnog industrijskog otpada. Otpad se doprema sa područja Gradova i Općina: Zenica, Visoko, Žepče, Zavidovići, Travnik, Novi Travnik, Vitez i Busovača koji čine Regiju za upravljanje čvrstim otpadom - Zenica. Na temelju zaključenih ugovora, komunalni otpad se doprema i sa područja platoa Babanovac na planini Vlašić i Grada Široki Brijeg. U 2024. godini na Regionalnoj deponiji “Mošćanica” zaprimljeno je ukupno 81.244,78 tona različitih vrsta otpada.

Društvo je nastavilo sa aktivnostima na izdvajanju korisnih materijala iz dopremljenog otpada. U 2024. godini, iz dopremljenih količina otpada izdvojeno je 84,07 tona korisnog materijala, te je po tom osnovu ostvaren neto prihod u iznosu od 58.445 KM, te se time

uštedjelo oko 2.747 m³ odlagališnog prostora (u periodu od 2008.-2024. godina uštedeno je ukupno 63.855,33 m³).

Za period od 01.01. – 31.12.2024. godine planirano je da se deponuje 76.152 tone komunalnog otpada, dok je u navedenom period stvarno dopremljeno 79.558,52 tone, što je za 3.406,52 tona više u odnosu na Plan.

Najveći korisnik usluga PD RDM je Grad Zenica sa 48,25% odloženih količina komunalnog otpada u odnosu na ukupno deponovane količine ove vrste otpada.

Društvo je u 2024. godini ostvarilo prihode u iznosu od 4.555.243 KM (u odnosu na Plan prihodi su veći za 204.898 KM, odnosno za 4,7%). S druge strane, **ukupni rashodi u 2024. godini su iznosili 3.516.195 KM** (u odnosu na Plan rashodi su veći za 478.535 KM, odnosno za 15,7%).

U strukturi rashoda najveću stavku predstavljaju – troškovi plaća i ostalih ličnih primanja u iznosu od 1.483.834 KM i amortizacija u iznosu od 1.447.555 KM.

Poslovna godina je okončana pozitivnim rezultatom, te **ostvarena neto dobit Društva za period 01.01. – 31.12.2024. godine iznosi 934.273 KM.**

Društvo je i u prošloj godini uspjelo zadržati finansijsku stabilnost i nastaviti trend ostvarivanja rezultata pozitivnog finansijskog poslovanja.

Društvo je tokom 2024. godine bilo solventno i likvidno, te je redovno izmirivalo finansijske obaveze prema dobavljačima, zaposlenicima, obaveze po osnovu poreza i doprinosa, obaveze po osnovu PDV-a i dr. Posebno treba naglasiti da je Društvo u 2024. godini izmirilo četiri anuiteta kredita prema Svjetskoj banci u ukupnom iznosu od 907.694,34 KM.

Na dan 31.12.2024. godine stanje potraživanja, novčanih sredstava i obaveza iznosi:

- Kratkoročna potraživanja (kupci) 638.663 KM
- Novčana sredstva 1.554.869 KM
- Kratkoročne obaveze (dobavljači) 30.218 KM

U 2024. godini realizovani su projekti: nabavka prese za baliranje reciklažnih materijala, nabavka putničkog automobila te je završena izgradnja solarne fotonaponske elektrane koja je nakon uspješnog okončanja probnog rada od 01.08.2024. godine počela isporučivati prve kilovate električne energije u mrežu.

U 2025. godini Društvo planira investirati oko 1,9 miliona KM u projekte i opremu koji su neophodni za rad Deponije (nabavka prečistača deponijskog filtrata, nabavka bagera, nabavka kamiona i nabavka i instaliranje toplotne pume).

Imajući u vidu obim investicije potrebne za proširenje kapaciteta za odlaganje otpada (procjene ukazuju da se na Deponiji može odlagati otpad još približno tri godine), Društvo će nastojati da osigura dio potrebnih sredstava putem kreditnih sredstava. Međutim, budući da Društvo neće biti u mogućnosti otplaćivati kreditno zaduženje iz redovnog poslovanja, biti će prisiljeno povećati cijenu svojih usluga. Preliminarne kalkulacije sugerišu da bi, radi pokrića dodatnih troškova, cijena komunalnog otpada trebala porasti za 9,10 KM/t bez PDV-a.

U 2024. godini Nadzorni odbor je održao 8 redovnih sjednica na kojima je razmatrano 50 tačaka dnevnog reda, dok su rukovođenje direktorice Mie Pojskić ocijenili kao uspješno, te su dali pozitivnu ocjenu o radu.

Reviziju finansijskih izvještaja obavilo je Društvo za reviziju, računovodstvo i konsalting „Etic“ d.o.o. Zenica, te su dali mišljenje s rezervom. Naglasili su da se finansijski izvještaji prikazuju objektivno, u svim materijalno značajnim stavkama finansijski položaj Društva na dan 31.12.2024. godine, te rezultati njegovog poslovanja i promjene u novčanom toku za godinu koja je okončana u skladu sa međunarodnim standardima finansijskog izvještavanja i računovodstvenim propisima koji se primjenjuju u FBiH.

Nadzorni odbor je svojim odlukama usvojio Izvještaj o poslovanju, Izvještaj o reviziji finansijskih izvještaja, te Izvještaj o radu Direktora PD RDM d.o.o. Zenica, za 2024. godinu., Također, Nadzorni odbor je Odlukom dao saglasnost na prijedlog za povećanje cijene usluge odlaganja komunalnog otpada na Regionalnoj deponiji „Mošćanica“.

Sektor za ekologiju i komunalne poslove, kao resor, zaključio je da je Društvo kontinuirano pružalo usluge prijema, kontrole i deponovanja otpada, uz postizanje uspješnosti poslovanja i realizaciju značajnih investicionih ulaganja bez dodatnog kreditnog zaduženja.

Sektor za javna preduzeća i ustanove dostavlja Izvještaj o poslovanju Privrednog društva “Regionalna deponija Mošćanica” d.o.o. Zenica u 2024. godini, sa pratećim izvještajima, Gradskom vijeću na dalje razmatranje i usvajanje.

PRILOZI:

1. Izvještaj o poslovanju PD “Regionalna deponija Mošćanica” d.o.o. Zenica za 2024. godinu, sa Odlukom Nadzornog odbora o usvajanju istih,
2. Izvještaj o radu Direktora u 2024. godini, sa Odlukom Nadzornog odbora o usvajanju istog,
3. Izvještaj o radu Nadzornog odbora u 2024. godini, sa Odlukom o donošenju Izvještaja o radu Nadzornog odbora,
4. Izvještaj neovisnog revizora o izvršenoj reviziji finansijskih izvještaja PD “RDM” d.o.o. Zenica za 2024. godinu, sa Odlukom o usvajanju Izvještaja revizije od strane Nadzornog odbora.

S poštovanjem,



Šefica sektora za JP i JU
po ovlaštenju

Berina Halilović-Mehić

DOSTAVLJENO:

1x Naslov
1x a/a